



**AN BORD ATHBHREITHNITHE MEABHAIR-SHLÁINTE
(AN DLÍ COIRIÚIL)**

MENTAL HEALTH (CRIMINAL LAW) REVIEW BOARD

Tuarascáil Bhliantúil 2022

An Bord Athbheithnithe Meabhair-Shláinte (An Dlí Coiriúil)
7 Plás Íle
Baile Átha Cliath 2, D02 TW98
Teileafón: (01) 8592296
R-phost: mhclrb_inbox@justice.ie
Suíomh Gréasáin: www.mhclrb.ie

CLÁR AN ÁBHAIR

Réamhrá an Chathaoirligh	Lch 3
Feidhm an Bhoird Athbhreithnithe Meabhair-Shláinte (An Dlí Coiriúil)	Lch 5
Athbhreithnithe ag an mBord	Lch 5
An Scéim um Chúnamh Dlíthiúil fá Mheabhair-Shláinte (An Dlí Coiriúil)	Lch 8
Orduithe um Urscaoileadh	Lch 9
Cionta nó Cionta Líomhnaithe	Lch 9
Faisnéis Airgeadais	Lch 10
Nochtadh Cosanta	Lch 11
Cosaint Sonraí	Lch 11
Dualgas na hEarnála Poiblí um Chomhionannas agus Cearta an Duine	Lch 11
Rialachas agus Rialuithe Inmheánacha	Lch 11
FOSCRÍBHINNÍ	
Foscríbhinn A - Líon na nÉisteachtaí in aghaidh na Míosa i 2022/2021	Lch 17
Foscríbhinn B - Líon na nOthar arna nAthbhreithniú in aghaidh Diagnóise i 2022/2021	Lch 18
Foscríbhinn C - Líon na nÉisteachtaí de réir Chineál an Athbhreithnithe i 2022/2021	Lch 19
Foscríbhinn D - Líon na nÉisteachtaí i 2022/2021 de réir an Ailt den Acht um an Dlí Coiriúil (Gealtacht), 2006, arna leasú	Lch 20
Foscríbhinn E - Meánlíon na gCásanna a Sannadh d'Ionadaithe Dlíthiúla ar an bPainéal um Chúnamh Dlíthiúil i 2022/2021	Lch 21
Foscríbhinn F - Líon na nOthar a Urscaoileadh go Coinníollach i 2022/2021	Lch 22
Foscríbhinn G - Cionta nó Cionta Líomhnaithe	Lch 23

1. RÉAMHRÁ AN CHATHAOIRLIGH

Tá áthas orm, mar Chathaoirleach ar an mBord Athbhreithnithe Meabhair-Shláinte (An Dlí Coiriúil) Tuarascáil Bhliantúil 2022 an Bhoird, ina dtugtar forléargas ar ghníomhaíochtaí an Bhoird le linn 2022, a thíolacadh. Is í seo an 16^ú Tuarascáil Bhliantúil ón mBord Athbhreithnithe.

D'aistrigh an Príomh-Ospidéal Meabhair-Ghalar go Port Reachrann ar an 13^ú Samhain, 2022. D'éirigh go maith leis an aistriú agus tá na hothair socraithe isteach sna saoráidí nua.

I 2022, tháinig laghdú beag ar líon na n-éisteachtaí athbhreithnithe a seoladh, i gcomparáid leis an mbliain roimhe sin. Sheol an Bord 180 athbhreithniú i gcomparáid le 196 i 2021, ina ndearnadh athbhreithniú ar choinneáil 82 othar. As na 82 othar a ndearnadh athbhreithniú ar a gcoinneáil, deonaíodh urscaoileadh coinníollach do cheathrar díobh. Deonaíodh urscaoileadh coinníollach do sheisear othar i 2021, as líon iomlán 87 a ndearnadh athbhreithniú ar a gcoinneáil an bhliain sin.

I mí na Samhna, chuir Stiúrthóir Feidhmiúcháin Cliniciúil eatramhach an Phríomh-Ospidéal Meabhair-Ghalar in iúl don Bhord go ndearna sí othar amháin a bhí urscaoilte go coinníollach a aisghairm chuig an ospidéal ar an bhforas go raibh tuairim réasúnach aici go raibh sárú ábhartha déanta ag an othar ar an Ordú um Urscaoileadh Coinníollach.

Chomh maith leis sin, i 2022, chuaigh an Bord ar aghaidh go dtí an 38^ú agus an 39^ú hathbhreithniú a sheoladh maidir le coinneáil roinnt othar.

Fuair an Bord dhá iarratas ar urscaoileadh neamhchoinníollach i 2022. Bhí dhá iarratas ar feitheamh ón mbliain roimhe sin, freisin. As na hiarratais uile a fuarthas, tarraingíodh siar ceann amháin agus dheonaigh an Bord trí urscaoileadh neamhchoinníollach.

Thar ceann mo chomhghleacaithe, gabhaim buíochas le Stiúrthóir Feidhmiúcháin Cliniciúil an Phríomh-Ospidéil Meabhair-Ghalar, an tOllamh Harry Kennedy, a chuaigh ar scor ó shin, agus leis an Stiúrthóir Feidhmiúcháin Cliniciúil eatramhach reatha, an Dr. Brenda Wright, as a gcabhair le linn na bliana. Gabhaim buíochas, freisin, leis na foirne ildisciplíneacha san ospidéal as an obair a rinne siad le linn dóibh tuarascálacha síciatracha a ullmhú d’othair roimh a gcuid éisteachtaí athbhreithnithe. Is eol don Bhord gur féidir leis an obair sin a bheith fadálach do gach duine a bhíonn páirteach inti. Tá an Bord buíoch as an gcabhair agus as an gcomhoibriú leanúnach ó shíciatraithe comhairleacha, altraí, teiripeoirí, seirbhísí sóisialta agus foireann riaracháin an ospidéil.

Arís, ba mhaith liom obair chomhaltaí Phainéal Ionadaithe Dlíthiúla an Bhoird, a leanann d’fheidmiú go cumasach coinsiasach ar son othar a thagann os comhair an Bhoird chun a gcoinneáil a athbhreithniú, a mholadh agus iad a mholadh as a gcomhoibriú leis na socruithe chun filleadh ar éisteachtaí i bpearsa san ospidéal.

Mar fhocal scoir, ba mhaith liom buíochas an Bhoird a chur in iúl do Catherine Hayes, Uasal, a chuaigh ar scor i mí Iúil, 2022, as a cuid oibre thar ceann an Bhoird le linn a téarma ina Rúnaí ar an mBord. Ba mhaith liom, freisin, buíochas a chur in iúl do Phríomh-Oifigeach Feidhmiúcháin an Bhoird, Aisling Uas. Brennan, Rúnaí nua an Bhoird, Anita Uas. Kelleher agus Ann Uas. Casey as an tseirbhís shármhaith éifeachtúil a thugadar don Bhord le linn na bliana.

Iarfhlaith Ó Néill
Cathaoirleach

31 Márta 2023

2. FEIDHM AN BHOIRD ATHBHREITHNITHE MEABHAIR SHLÁINTE (AN DLÍ COIRIÚIL)

Bunaíodh an Bord Athbhreithnithe Meabhair-Shláinte (An Dlí Coiriúil) ar an 27 Meán Fómhair, 2006, faoi Alt 11 den Acht um an Dlí Coiriúil (Gealtacht), 2006. Tá an Bord neamhspleách go reachtúil i bhfeidhmiú a fheidhmeanna.

Tá an Bord freagrach as athbhreithniú a dhéanamh ar choinneáil othar a atreoraíodh chuig lárionaid ainmnithe ag eascairt as cinneadh arna dhéanamh ag na cúirteanna go bhfuil siad neamhinniúil ar dhul faoi thriail, nó ar cinneadh iad a bheith neamhchiontach i gcion de dheasca gealtachta. Faoi Acht 2006, arna leasú leis an Acht um an Dlí Coiriúil (Gealtacht), 2010, tá sé de chumhacht ag an mBord a ordú leanúint d’othair a choinneáil, nó a n-urscaoileadh coinníollach, nó a n-urscaoileadh neamhchoinníollach, a ordú. Le linn dó teacht ar chinneadh, ní foláir don Bhord aird a thabhairt ar leas agus sábháilteacht an othair agus ar leas an phobail.

Déanann an Bord athbhreithniú, freisin, ar choinneáil príosúnach, lena n-áirítear príosúnaigh mhíleata, a ndearnadh iad a aistriú chuig lárionad ainmnithe agus neamhord meabhrach orthu. Féadfaidh an Bord a ordú leanúint dá gcoinneáil nó iad a chur ar ais sa phríosún.

3. ATHBHREITHNITHE AG AN mBORD

De réir mar a fhoráiltear le hAcht 2006, ní foláir don Bhord coinneáil gach othair a athbhreithniú i gceann agaí nach faide ná sé mhí. De ghnáth, bhíonn dhá éisteacht athbhreithnithe in aghaidh na bliana ag othair fhadtéarmacha ach d’fhéadfadh níos mó a bheith ag cuid acu de bharr go bhféadfar athbhreithniú a sheoladh ar thionscnamh an

Bhoird nó ar iarraidh ó othar nó ó Stiúrthóir Cliniciúil an Phríomh-Ospidéal Meabhair-Ghalar, ar leith ó na héisteachtaí a sceidealtar go rialta. Féadfaidh an tAire Dlí agus Cirt a ordú don Bhord athbhreithniú a sheoladh maidir le coinneáil príosúnaigh a thugtar isteach san ospidéal dá ainneoin nó dá hainneoin.

De ghnáth, bíonn idir 80 agus 90 othar á gcoinneáil aon tráth áirithe sa Phríomh-Ospidéal Meabhair-Ghalar faoi Acht 2006. Tagann athrú ar an líon sin mar go ndéantar, seachas na hothair arna gcoinneáil ar feadh tréimhsí níos faide, othair a aistriú ón bpríosún, le toiliú nó dá n-ainneoin, le haghaidh cúraim nó cóireála nach mbíonn ar fáil dóibh sa phríosún. D'fhéadfadh sé, áfach, nach dtiocfadh daoine de na hothair sin os comhair an Bhoird chun athbhreithniú a dhéanamh ar a gcoinneáil mar go bhféadfaidh an Stiúrthóir Cliniciúil, tar éis dul i gcomhairle leis an Aire Dlí agus Cirt, iad a aistriú ar ais chuig an bpríosún tráth ar bith.

Rinne an Bord athbhreithniú ar choinneáil 82 othar i 2022, ar laghdú beag é ar líon na n-othar a ndearnadh athbhreithniú ar a gcoinneáil i gcomparáid le 2021, nuair a rinneadh athbhreithniú ar 87 n-othar. As na 82 othar, mná a bhí i 9 nó 11% díobh agus fir a bhí i 73 nó 89% díobh. Sheol an Bord 180 éisteacht athbhreithnithe san iomlán i gcomparáid le 196 sa bhliain roimhe sin, ar laghdú de bheagán os cionn 8% é ar líon na n-éisteachtaí athbhreithnithe. As na 82 othar, fáthmheasadh scitsifréine a bheith ar 63% díobh, neamhord scitseamhothachtálach a bheith ar 17% díobh agus neamhoird eile a bheith ar 20% de na hothair. Tá sé sin inchomórtais le 2021, bliain inar fáthmheasadh scitsifréine a bheith ar 62% de na hothair, neamhord scitseamhothachtálach a bheith ar 22% díobh agus neamhoird eile a bheith ar 16% díobh. Is ceart a thabhairt do d'aire go ndéanann an Bord

athbhreithniú ar an gcroíghrúpa céanna othar gach bliain. (Féach Foscríbhinní A agus B maidir leis seo).

Den chéad uair, sheol an Bord an 36^ú agus an 39^ú hathbhreithniú ar choinneáil roinnt othar i 2022. De na 180 éisteacht athbhreithnithe, an 38^ú hathbhreithniú a bhí i gceist i seacht gcás agus an 39^ú hathbhreithniú a bhí i gceist in dhá cheann. Bhí 13% san iomlán de na héisteachtaí ag an 36^ú go dtí an 39^ú céim athbhreithnithe. Bhí 16% de na héisteachtaí ag an 1^ú go dtí an 5^ú céim athbhreithnithe, i gcomparáid le 18% i 2021. Astu sin, an 1^ú athbhreithniú a bhí i gceist le seacht n-athbhreithniú nó 4%, mar a chéile le 2021 nuair a bhí seacht gcinn d'athbhreithnithe den sórt sin ann, líon ar 4% d'iomlán na bliana sin é, freisin. (Féach Foscríbhinn C maidir leis seo).

Mar a bhain le blianta eile, bhain tromlach na n-éisteachtaí athbhreithnithe le hothair arna gcimiú chun an Phríomh-Ospidéal Meabhair-Ghalar faoi Alt 5(2) d'Acht 2006, tar éis iad a fháil neamhchiontach i gcion de dheasca gealtachta. I 2022, bhain 129 n-éisteacht, sin 72% den líon iomlán, le coinneáil othar a cimíodh faoi Alt 5(2). 147 an líon a bhí sa chatagóir sin i 2021, sin 75% de líon iomlán na n-éisteachtaí an bhliain sin. Arís i 2022, bhain an dara líon ba mhó de na héisteachtaí athbhreithnithe le hothair a coinníodh faoi Alt 15(2) den Acht, ar phríosúnaigh iad a aistríodh dá n-ainneoin chuig an bPríomh-Ospidéal Meabhair-Ghalar le haghaidh cúraim nó cóireála nach bhféadfaí a thabhairt dóibh sa phríosún. Bhain 13% de na héisteachtaí athbhreithnithe i 2022 leis an ngrúpa sin, i gcomparáid le 12% i 2021. Bhain 13% de na héisteachtaí athbhreithnithe i 2022 le hothair a coinníodh faoi Alt 4(5) i gcomparáid le 9% an bhliain roimhe sin. (Féach Foscríbhinn D maidir leis seo).

4. AN SCÉIM UM CHÚNAMH DLÍTHIÚIL FÁ MHEABHAIR-SHLÁINTE (AN DLÍ COIRIÚIL)

Ceanglaítear ar an mBord, le hAlt 12(1) (c) d’Acht 2006, ionadaí dlíthiúil a shannadh do gach othar ar ábhar d’athbhreithniú a choinneáil nó a coinneáil, mura mbeartaíonn an t-othar ionadaíocht dhlíthiúil a fhostú ar a chostas nó a costas féin. Chuige sin, bhunaigh an Bord an Scéim um Chúnamh Dlíthiúil fá Mheabhair-Shláinte (An Dlí Coiriúil), 2006, faoinar bunaíodh painéal d’ionadaithe dlíthiúla agus déantar socrú maidir leis na táillí dlí a bhaineann le hionadaíocht os comhair an Bhoird Athbhreithnithe. Féadfaidh othair, más mian leo, seirbhísí aturnae a shanntar ón bpainéal a dhiúltú agus aturnae eile ón bpainéal a iarraidh nó féadfaidh siad aturnae nach ón bpainéal a fhostú ar a gcostas féin. Ar mhaithe le leanúnachas d’othair, ag féachaint don fhíoras go bhfuil neamhord meabhrach orthu, déanann an Bord a dhícheall an t-aturnae céanna a shannadh chun feidhmiú ar son othair ag éisteachtaí athbhreithnithe ina dhiaidh sin.

23 chomhalta a bhí ar phainéal na n-ionadaithe dlíthiúla ag deireadh 2022. Ceapadh beirt aturnaetha eile ar an bpainéal (athcheapadh duine díobh) i rith na bliana agus d’éirigh ceathrar as.

7 gcás an meánlíon cásanna a sannadh d’aturnaetha ar an bPainéal i 2022. Sannadh meánlíon 15 chás an duine don phríomhcheathairíl d’aturnaetha, i gcomparáid le 14 an bhliain roimhe sin. Sannadh meánlíon 7 gcás don dara agus an tríú ceathairíl le chéile, i gcomparáid le meánlíon 9 gcás i 2021. Sannadh meánlíon náid cás an duine don bhuncheathairíl i 2022, i gcomparáid le meánlíon d’aon chás amháin an bhliain roimhe sin. (Féach Foscríbhinn E maidir leis seo).

5. ORDUITHE UM URSCAOILEADH

Cheadaigh an Bord urscaoileadh coinníollach i leith ceathrar othar ón bPríomh-Ospidéal Meabhair-Ghalar i 2022. 25 bliana an meánfhad coinneála san ospidéal do na hothair a urscaoileadh go coinníollach. Beagán os cionn seacht mbliana an meánfhad a mhair an dá cheann ba ghiorra agus 44 mbliana an meánfhad a mhair an dá cheann ab fhaide. Is ceart a thabhairt do d'aire nach foras riachtanach ná leordhóthanach, ann féin, é an t-achar ama a dhéantar othar a choinneáil san ospidéal chun urscaoileadh coinníollach a dheonú. (Féach Foscríbhinn F maidir leis seo).

Aisghaireadh othar amháin ó urscaoileadh coinníollach le linn 2022, mar go raibh Stiúrthóir Cliniciúil an Phríomh-Ospidéil Meabhair-Ghalar tagtha ar an tuairim go raibh sárú ábhartha déanta ag an othar ar an ordú um urscaoileadh coinníollach.

Fuair an Bord dhá iarratas ar urscaoileadh neamhchoinníollach i 2022 ó othair a bhí urscaoilte go coinníollach ar feadh 12 mhí nó níos faide, tarraingíodh siar iarratas amháin. Dheonaigh an Bord trí urscaoileadh neamhchoinníollach i 2022, dhá cheann díobh a ndearnadh iarratas orthu i 2021.

Fuarthas dhá iarratas maidir le hordú um urscaoileadh coinníollach a leasú i 2022, tarraingíodh siar ceann agus cheadaigh an Bord an ceann eile.

6. CIONTA NÓ CIONTA LÍOMHNAITHE

Ar áireamh sna cineálacha cionta, nó na cionta líomhnaithe, inar cúisíodh nó inar ciontaíodh othair a coinníodh sa Phríomh-Ospidéal Meabhair-Ghalar i 2022 bhí

dúnmharú, iarracht ar dhúnmharú, dúnorgain agus ionsaí ba chúis le mórdhíobháil choirp. As na 82 n-othar a ndearnadh athbhreithniú ar a gcoinneáil, bhí 34 díobh cúisithe, nó ciontaithe, i ndúnmharú. Duine de theaghlach an othair ba ea móramh d'íospartaigh an chiona nó an chiona líomhnaithe sin. Cúisíodh nó ciontaíodh 9 n-othar in iarracht ar dhúnmharú/dúnorgain/bás de dheasca tiomáint chontúirteach. Cúisíodh nó ciontaíodh 24 othar in ionsaí ba chúis le díobháil / ionsaí ba chúis le mórdhíobháil choirp agus cúigear díobh i gcoirloscadh. Ar áireamh sna cionta eile bhí ionsaí gnéasach, bagairt duine a mharú, ciapadh, príosúnú neamhdhleathach, foghail agus scian a shealbhú le hintinn díobháil a dhéanamh, agus sceana a shealbhú agus imeaglú. (Féach Foscríbhinn G maidir leis seo).

7. **FAISNÉIS AIRGEADAIS**

Maoinítear an Bord Athbhreithnithe as Mírcheann A.13 de Vóta Oifig an Aire Dlí agus Cirt. Cloíonn an Bord Athbhreithnithe leis an gCód Caiteachais Phoiblí. I 2022, fuair an Bord Athbhreithnithe leithdháileadh buiséid €439,000. Tharla aistriú an Phríomh-Ospidéal Meabhair-Ghalar i mí na Samhna, 2022. Níor ardaigh caiteachas an Bhoird, mar a rabhtas ag bhí súil leis. €265,000 an caiteachas iomlán a bhí ann i 2022 faoi Mhírcheann A.13.

Leagtar amach thíos na príomh-mhíreanna caiteachais:

Cúnamh Dlíthiúil in Aisce	€90,751
Táillí na gComhaltaí Boird	*€93,500
Táille an Chathaoirligh	€70,875
Comhairle Dlí	€0

*Táillí a bhain le Nollaig 2021 agus a íocadh i mí Eanáir 2022 san áireamh. Níl táillí a bhain le Nollaig 2022 agus a íoctar i mí Eanáir 2023 san áireamh.

8. NOCHTADH COSANTA

Tá Beartas um Nochtadh Cosanta na Roinne Dí agus Cirt glactha ag an mBord Athbhreithnithe mar bheartas an Bhoird maidir le nochtaí cosanta san áit oibre. I gcomhréir le ceanglais tuairiscithe, dearbhaítear nach bhfuarthas aon tuairisc maidir le nochtadh cosanta i 2022.

9. COSAINT SONRAÍ

Tá beartas um chosaint sonraí na Roinne Dí agus Cirt glactha ag an mBord Athbhreithnithe. Mar gheall ar a mhéid, ní mheastar é a bheith indéanta ag an mBord Oifigeach Cosanta Sonraí dá chuid féin a cheapadh. Tá Oifigeach Cosanta Sonraí na Roinne ceaptha mar Oifigeach Cosanta Sonraí don Bhord.

10. DUALGAS NA hEARNÁLA POIBLÍ UM CHOMHIONANNAS AGUS CEARTA AN DUINE

Tá an Bord Athbhreithnithe tiomanta dá chinntiú go gcomhlíontar a fhreagrachtaí faoi alt 42 den Acht fá Choimisiún na hÉireann um Chearta an Duine agus Comhionannas, 2014, lena gcuirtear oibleagáid dhearfach ar chomhlachtaí poiblí, le linn dóibh a bhfeidhmeanna a chomhlíonadh, aird a thabhairt ar an ngá atá ann deireadh a chur leis an idirdhealú, comhionannas deiseanna a chur chun cinn agus cearta daonna na foirne agus na ndaoine dá soláthraíonn sé seirbhísí a chosaint. Choimeád an Bord Athbhreithnithe an dualgas sin i gcuimhne le linn dó a fheidhmeanna a chomhlíonadh i 2022.

11. RIALACHAS AGUS RIALUITHE INMHEÁNACHA

Struchtúr agus Comhaltas an Bhoird Athbhreithnithe

Is comhlacht gar-bhreithiúnach, seachas bord rialachais, atá sa Bhord Athbhreithnithe Meabhair-Shláinte (An Dí Coiriúil) a dhéanann athbhreithniú ar choinneáil othar a bhíonn

á gcoinneáil i lárionaid ainmnithe faoin Acht um an Dlí Coiriúil (Gealtacht), 2006. Is iad atá ar an mBord Cathaoirleach agus cibé líon gnáthchomhaltaí a theastóidh ón Aire Dlí agus Cirt tar éis dul i gcomhairle leis an Aire Sláinte. Breitheamh scortha den Ard-Chúirt atá sa Chathaoirleach atá ann faoi láthair agus tá triúr gnáthchomhalta ann, ar síciatraithe comhairleacha beirt díobh agus ar comhairleoir-shíciteiripeoir duine díobh. An tAire a cheapann comhaltaí uile an Bhoird ar feadh tréimhse cúig bliana, de réir mar a fhoráiltear le hAcht 2006. Leagtar amach faoi seo comhaltas an Bhoird i 2022 agus dáta ceaptha na gcomhaltaí:

Comhalta	Ceaptha
An Breitheamh Uasal Iarfhlaith Ó Néill	Meán Fómhair 2014 Athcheaptha Meán Fómhair 2019
An Dr. Katherine Brown Síciatraí Comhairleach	Bealtaine 2017 Athcheaptha Bealtaine 2022
Nóra McGarry, Uas. Comhairleoir-Shíciteiripeoir	Meán Fómhair 2011 Athcheaptha Meán Fómhair 2016 Athcheaptha Meán Fómhair 2021
An Dr. Elizabeth Walsh Síciatraí Comhairleach	Eanáir 2013 Athcheaptha Eanáir 2018 Athcheaptha Eanáir 2023

Cothromaíocht Inscne

Is faoin Roinn Dlí agus Cirt atá sé comhaltaí a cheapadh ar an mBord Athbhreithnithe agus níl aon bhaint ag an mBord le ceapacháin. Amhail ar an 31 Nollaig 2022, bhí comhalta fireann amháin (25%) agus triúr comhaltaí baineanna (75%) ar an mBord Athbhreithnithe.

Freastal ar Éisteachtaí agus Táillí

Is annamh a thagann an Bord Athbhreithnithe le chéile, seachas le haghaidh éisteachtaí sa Príomh-Ospidéal Meabhair-Ghalar, Port Reachrann. Le linn dó coinneáil othar a

athbhreithniú, suíonn an Bord i bpainéal de thriúr, agus bíonn an Cathaoirleach agus síciatraí sainchomhairleach amháin ar a laghad ar an bpainéal i gcónaí.

Táille €250 a íoctar le gnáthchomhaltaí in aghaidh gach éisteachta athbhreithnithe ar a ndéanann siad freastal. Íoctar an táille chéanna as freastal ar éisteachtaí i dtaca le hiarratais ar urscaoileadh neamhchoinníollach agus i dtaca le hiarratais chun coinníollacha a bhaineann le hurscaoileadh a leasú nó a athrú. I 2022, d'fhreastail comhaltaí uile an Bhoird ar na héisteachtaí a raibh siad sceidealta freastal orthu. D'fhreastail an Dr. Brown ar 106 éisteacht, d'fhreastail Nóra Uasal McGarry ar 184 éisteacht agus d'fhreastail an Dr. Walsh ar 78 éisteacht.

An Cathaoirleach a bhíonn i gceannas ar gach éisteacht athbhreithnithe agus ar éisteachtaí chun iarratais ar urscaoileadh neamhchoinníollach a bhreithniú agus iarratais chun coinníollacha a leasú. Tugann an Cathaoirleach comhairle agus treoir don Príomh-Oifigeach Feidhmiúcháin freisin maidir le gnó an Bhoird a bhainistiú agus maidir le bainistiú aon chásanna dlí inar páirtí an Bord. Íoctar táille bhliantúil €70,875 leis an gCathaoirleach.

Fostaithe

Is Leas-Phríomhoifigeach sa Roinn Dlí agus Cirt í Príomh-Oifigeach Feidhmiúcháin an Bhoird, Aisling Uas. Brennan, a chaitheann cuid dá cuid ama le dualgais Phríomh-Oifigeach Feidhmiúcháin an Bhoird. Tá an Príomh-Oifigeach Feidhmiúcháin freagrach as gnó agus acmhainní an Bhoird a bhainistiú agus a riaradh ó lá go lá. Ní íoctar táille ar leithligh leis an bPríomh-Oifigeach Feidhmiúcháin as a cuid oibre leis an mBord Athbhreithnithe.

Tacaíonn Ardoifigeach Feidhmiúcháin agus Oifigeach Cléireachais, atá ar iasacht ón Roinn Dlí agus Cirt, leis an mBord Athbheithnithe. Is státseirbhísigh iad foireann an Bhoird Athbheithnithe agus íoctar rátaí pá cuí na státseirbhíse a bhaineann lena ngrád leo.

Déanann Ionad Seirbhísí Comhroinnte Párolla na Roinne Caiteachais Phoiblí agus Athchóirithe íoc tháillí na gComhaltaí Boird a phróiseáil. Déanann Lárionad Seirbhísí Comhroinnte Airgeadais na Roinne Dlí agus Cirt íocaíochtaí eile a phróiseáil.

Formhaoirsiú agus Rialuithe Inmheánacha

Thángthas ar Chomhaontú Formhaoirsithe don tréimhse 2020 – 2022 leis an Roinn Dlí agus Cirt agus shínigh an Príomh-Oifigeach Feidhmiúcháin é thar ceann an Bhoird Athbheithnithe. Leanfaidh an Comhaontú i bhfeidhm go dtí deireadh na bliana 2022 agus foráiltear go ndéanfar é a athbheithniú agus a nuashonrú tuairim is gach 12 mhí, más gá. Comhaontaíodh sa Chomhaontú, mar gheall ar fheidhmeanna reachtacha cúnga an Chathaoirligh agus neamhspleáchas reachtúil an Bhoird agus chomh beag is atá sé, go ndéanfaidh an Príomh-Oifigeach Feidhmiúcháin an Tuarascáil Chuimsitheach a cheanglaítear a thabhairt don Aire de réir an *Chóid Cleachtais chun Comhlachtaí Stáit a Rialú*, 2016. Maidir le comhlíonadh an *Chóid Cleachtais*, tá an fhoráil den *Chód* a bhaineann le *‘Comhlíon nó Míinigh’* curtha i bhfeidhm ag an Roinn maidir leis an mBord Athbheithnithe.

Maidir le rialuithe inmheánacha agus bainistiú priacail, mar gheall ar mhéid an Bhoird Athbheithnithe, ní mheastar gurb indéanta don Bhord Aonad Iniúchóireachta nó Coiste Iniúchóireachta agus Priacail a bhunú. Ina ionad sin, tá socrúithe eile bunaithe chun rochtain a thabhairt don Bhord ar Aonad Iniúchóireachta agus ar Choiste Iniúchóireachta

agus Priacail Inmheánach na Roinne i ndáil le rialachas airgeadais. Déanann an Príomh-Oifigeach Feidhmiúcháin measúnú ar phríomhphriacail an Bhoird Athbhreithnithe agus déantar na priacail a shainaitheann a áireamh ar an gClár Priacail arna chothabháil ag an Roinn. Is é an priacal is mó atá sainaitheanta ná nach ndéanfar éisteachtaí athbhreithnithe a chur i gcrích laistigh de na teorainneacha ama reachtúla. Leis na bearta maolaithe atá glactha, táthar á chinntiú go ndéantar athbhreithnithe a chur i gcrích de réir an dlí.

Ní cheanglaítear leis an reachtaíocht bhunaitheach ar an mBord Athbhreithnithe Ráitis Airgeadais a chur ar fáil. Déanann an Bord, tríd an bPríomh-Oifigeach Feidhmiúcháin, idirchaidreamh le hIonad Seirbhísí Comhroinnte Airgeadais na Roinne Dlí agus Cirt, agus tugann an tIonad tuarascáil ar ioncam agus caiteachas an Bhoird i dtuarascálacha bainistíochta míosúla na Roinne. Déanann an Príomh-Oifigeach Feidhmiúcháin na tuarascálacha míosúla a choimeád faoi athbhreithniú agus tá nósanna imeachta curtha ar bun chun a chinntiú go n-údaraithear caiteachas de réir threoirínte na Roinne.

Ag féachaint do mhéid an Bhoird agus don bhonn reachtúil atá lena shainchúram, ar sainchúram é nach n-athraítear mura leasaítear reachtaíocht, ní mheastar gur gá don Bhoird plean straitéiseach a ullmhú. Mar sin féin, foilsíonn an Bord Athbhreithnithe staidreamh iomchuí maidir lena aschur ina Thuarascáil Bhliantúil a chuirtear faoi bhráid an Aire Dlí agus Cirt agus a fhoilsítear ar shuíomh gréasáin an Bhoird.

Cloíonn an Bord Athbhreithnithe le treoirínte agus beartais na seirbhíse poiblí maidir le soláthar. Más gá sin, is i gcomhairle le hAonad Soláthair na Roinne Dlí agus Cirt agus Oifig Soláthair an Rialtais a dhéantar aon chomórtas soláthair a sheoladh.

Tabhair do d'aire:

Tá na nithe seo a leanas le fáil ar shuíomh gréasáin an Bhoird www.mhclrb.ie


Comhdhlúthú riaracháin ar an Acht um an Dlí Coiriúil (Gealtacht), 2006, arna ullmhú ag an gCoimisiún um Athchóiriú an Dlí;
([www.lawreform.ie/ fileupload/revisedacts/withannotations/en_act_2006_0011.pdf](http://www.lawreform.ie/fileupload/revisedacts/withannotations/en_act_2006_0011.pdf))

Nósanna Imeachta an Bhoird Athbhreithnithe Meabhair-Shláinte (An Dlí Coiriúil)
<https://www.mhclrb.ie/wp-content/uploads/2020/06/Procedures-MHRB.pdf>

Téarmaí agus Coinníollacha na Scéime um Chúnamh Dlí Meabhair-Shláinte (An Dlí Coiriúil),
2006 <https://www.mhclrb.ie/wp-content/uploads/2020/06/Terms-Conditions-of-MHCLRB.pdf>

Líon na nÉisteachtaí in aghaidh na Míosa 2022/2021

Mí	Líon na nÉisteachtaí i 2022	% den Iomlán 2022	Líon na nÉisteachtaí i 2021	% den Iomlán 2021
Eanáir	11	6%	16	8%
Feabhra	15	8%	18	9%
Márta	17	9%	12	6%
Aibreán	16	9%	21	11%
Bealtaine	20	11%	13	7%
Meitheamh	9	5%	14	7%
Iúil	17	9%	20	10%
Lúnasa	15	8%	13	7%
Meán Fómhair	12	7%	22	11%
Deireadh Fómhair	22	12%	13	7%
Samhain	10	6%	15	8%
Nollaig	16	9%	19	9%
Iomlán	180		196	



Líon na nOthar arna nAthbheithniú in aghaidh Diagnóise i 2022/2021

Diagnóis	Líon na n-othar a athbheithniódh 2022	% den Iomlán 2022	Líon na n-othar a athbheithniódh 2021	% den Iomlán 2021
Scitsifréine	52	63%	54	62%
Neamhord Scitseamothachtálach	14	17%	19	22%
Neamhoird eile	16	20%	14	16%
Iomlán	82		87	

Áirítear ar na Neamhoird Eile:

Neamhord Mothachtálach Dépholach

Dúlagar síceoiseach

Neamhord de chuid Speictream an Uathachais

Siondróm Asperger

Síocóis Mhothachtálach

Síocóis Orgánach

Neamhord Dúlagair Athfhillteach Trom le Gnéithe Síocóiseacha

Taom Síocóise/Géarthaom Síocóise


Neamhord Dúlagair

Síocóis de dheasca Drugaí

Neamhord Pearsantachta de dheasca a bheith Míshocair ó thaobh na Mothúchán de


Neamhord Pearsantachta Orgánach

Míchumas Intleachtúil



Líon na nÉisteachtaí i 2022/2021 in aghaidh Chineál an Athbhreithnithe

Cineál an Athbhreithnithe	Líon na nAthbhreithnuithe i 2022	% den iomlán 2022	Líon na nAthbhreithnuithe i 2021	% den iomlán 2021
1ú hAthbhreithniú	7	4%	7	4%
2ú-5ú hAthbhreithniú	21	12%	28	14%
6ú-10ú hAthbhreithniú	39	22%	43	22%
11ú-15ú hAthbhreithniú	27	15%	35	18%
16ú-20ú hAthbhreithniú	39	22%	36	18%
21ú-25ú hAthbhreithniú	12	7%	9	5%
26ú-30ú hAthbhreithniú	7	4%	10	5%
31ú-35ú hAthbhreithniú	4	2%	21	10%
36ú-39ú hAthbhreithniú	24	13%	7	4%
Iomlán	180	100%	196	100%




Líon na nÉisteachtaí i 2022/2021 in aghaidh an Ailt den Acht um an Dlí Coiriúil (Gealtacht), 2006, arna leasú

Alt d'Acht 2006	Líon na nÉisteachtaí 2022	% den Iomlán 2022	Líon na nÉisteachtaí 2021	% den Iomlán 2021
Alt 4(3)	3	2%	7	3%
Alt 4(5)	24	13%	17	9%
Alt 5(2)	129	72%	147	75%
Alt 15(2)	24	13%	23	12%
Alt 15(5)			2	1%
Iomlán	180		196	

Tabhair do d'aire: Tá othar amháin coinnithe faoi Alt 5(2) agus Alt 15(1).
Níl coinneáil an othair sin á chomhaireamh faoi Alt 5(2).

- Alt 4(3)** Neamh-inniúil ar Phléadáil, an Cúirt Dúiche
Alt 4(5) Neamh-inniúil ar Phléadáil, Cúirt Eile
Alt 5(2) Neamhchiontach de dheasca gealtachta
Alt 15(2) Aistriú neamhdheonach ó Príosún
Alt 15(5) Leanúint d'aistriú deonach ón bPríosún
 (tar éis diúltú do chúram nó do chóireáil)



Meánlíon na gCásanna a Sannadh d'Íonadaithe Dílíthiúla
ar an bPainéal um Chúnamh Dílíthiúil i 2022/2021

Bliain	Líon na nÍonadaithe Dílíthiúla ar an bPainéal	Meánlíon na gcásanna a sannadh	Meánlíon na gcásanna a sannadh An Chéad Cheathairíil	Meánlíon na gcásanna a sannadh An 2ú & 3ú Ceathairíil	Meánlíon na gcásanna a sannadh An Bhuncheathairíil
2022	27*	7	13	7	0
2021	25**	8	14	9	1

* Ag deireadh 2022 bhí 23 chomhalta ar an bPainéal. Le linn na bliana, ceapadh beirt chomhaltaí breise (athcheapadh duine díobh) agus d'éirigh ceathrar comhaltaí as.

* Ag deireadh 2021 bhí 25 chomhalta ar an bPainéal. Le linn na bliana, ceapadh comhalta breise amháin agus d'éirigh comhalta amháin as.

Líon na nOthar a Urscaoileadh
Go Coinníollach i 2022/2021

Mí an Ordaithe um Urscaoileadh Coinníollach	Líon na nOthar	Líon na nOthar
	2022	2021
Feabhra	1	1
Márta		1
Bealtaine	1	1
Lúnasa	1	
Meán Fómhair		2
Deireadh Fómhair	1	
Samhain		1
Iomlán	4	6

**Cionta nó Cionta Líomhnaithe othar a ndearnadh
athbhreithniú ar a gcoinneáil i 2022**

Cineál an Chiona nó an Chiona líomhnaithe	Líon na n-othar a cúisíodh, nó a ciontaíodh, i gcion	
Dúnmharú inar dhuine den teaghlach an t-íospartach ina raibh aithne ag an othar ar an íospartach inar strainséir an t-íospartach	34	17 9 8
Iarracht ar Dhúnmharú / Dúnorgain/ Bás de dheasca tiomáint chontúirteach inar dhuine den teaghlach an t-íospartach / ina raibh aithne ag an othar ar an íospartach inar strainséir an t-íospartach	9	5 4
Ionsaí ba chúis le díobháil/mórdhíobháil choirp inar dhuine den teaghlach an t-íospartach ina raibh aithne ag an othar ar an íospartach inar strainséir an t-íospartach	24	2 7 15
Coirloscadh	5	
Eile	10	
Iomlán	82	

Tabhair do d'aire

- 1) Maidir le hothair a ciontaíodh, nó a cúisíodh i níos mó ná cion / cion líomhnaithe amháin, cuireadh I gcatagóir iad de réir an chiona/an chiona líomhnaithe ba thromchúisí.
- 2) I mionlach de na cásanna, bhí níos mó ná íospartach amháin i gceist sa chion inar cúisíodh nó inar ciontaíodh othar.
- 3) Áirítear sa chatagóir "**Eile**" ionsaí gnéasach, bagairt duine a mharú, ciapadh, príosúnú neamhdhleathach, foghail agus scian a shealbhú le hintinn díobháil a dhéanamh agus sceana a shealbhú agus imeaglú.